

東
華
續
錄

東華續錄目錄

道光一

起嘉慶二十五年七月己卯盡九月

道光二

起嘉慶二十五年十月盡十二月

道光三

起道光元年正月盡六月

道光四

起元年七月盡十二月

道光五

起二年正月盡六月

道光六

起二年七月盡十二月

道光七

起三年正月盡六月

道光八

起三年七月盡十二月

道光九

起四年正月盡六月

道光十

起四年七月盡十二月

道光十一

起五年正月盡六月

道光十二

起五年七月盡十二月

道光十三

起六年正月盡六月

道光十四

起六年七月盡十二月

道光十五

起七年正月盡六月

道光十六

起七年七月盡十二月

道光十七

起八年正月盡六月

道光十八

起八年七月盡十二月

道光十九

起九年正月盡六月

道光二十

起九年七月盡十二月

道光二十一

起十年正月盡六月

道光二十二

起十年七月盡十二月

道光二十三

起十一年正月盡六月

道光二十四

起十一年七月盡十二月

道光二十五

起十二年正月盡六月

道光二十六

起十二年七月盡十二月

道光二十七

起十三年正月盡六月

道光二十八

起十三年七月盡十二月

道光二十九

起十四年正月盡六月

道光三十

起十四年七月盡十二月

道光三十一

起十五年正月盡六月

道光三十二

起十五年七月盡十二月

道光三十三

起十六年正月盡六月

道光三十四

起十六年七月盡十二月

道光三十五

起十七年正月盡六月

道光三十六

起十七年七月盡十二月

道光三十七

起十八年正月盡六月

道光三十八

起十八年七月盡十二月

道光三十九

起十九年正月盡六月

道光四十

起十九年七月盡十二月

道光四十一

起二十年正月盡六月

道光四十二

起二十年七月盡十二月

道光四十三

起二十一年正月盡六月

道光四十四

起二十一年七月盡十二月

道光四十五

起二十二年正月盡六月

道光四十六

起二十二年七月盡十二月

道光四十七

起二十三年正月盡六月

道光四十八

起二十三年七月盡十二月

道光四十九

起二十四年正月盡六月

道光五十

起二十四年七月盡十二月

道光五十一

起二十五年正月盡六月

道光五十二

起二十五年七月盡十二月

道光五十三

起二十六年正月盡六月

道光五十四

起二十六年七月盡十二月

道光五十五

起二十七年正月盡六月

道光五十六

起二十七年七月盡十二月

道光五十七

起二十八年正月盡六月

道光五十八

起二十八年七月盡十二月

道光五十九

起二十九年正月盡十二月

道光六十

起三十年正月盡是月丁未

東華續錄

道光一

臣王先謙敬編

臣周綱蕃恭校

宣宗成皇帝

仁宗第二子也

母孝淑睿皇后喜塔臘氏原任

總管內務府大臣副都統追封承恩公和爾經額之女以乾隆四十七年壬寅八月初十日寅時誕上於撝芳殿中所天表挺奇

宸儀協度順身隆準玉理珠衡自六齡就傅維時編修秦承業檢

討萬承風先後侍學經史融貫奎藻日新迨學問已成猶復時敏

修來與禮部右侍郎汪廷珍翰林院侍讀學士徐頤朝夕講論

聖業益精幼卽神武智勇天錫乾隆辛亥秋侍高宗純皇帝行

園威遜格爾引弓獲鹿喜動天顏黃裙翠翎寵賚優渥御

製詩堯年避暑奉慈甯樺室安居聰敬聽老我策驄尙武服幼

東華續錄

道光一

孫中鹿賜花翎是宜誌事成七律所喜爭先早二齡蓋高宗以十二歲時木蘭從獮初圍得熊上則初圍得鹿年甫十齡也

詩又云家法永遵縣奕葉承天恩貺慎儀刑則期勗之意深

矣嘉慶元年丙辰冬十一月乙丑賜成大婚禮是爲孝穆成

皇后越甲申仁宗奉高宗幸中所進膳上捧觴上壽鞠

臚承歡兩朝恩眷日加隆焉四年己未四月初十日仁宗

遵密建家法親書上名緘藏鐫匣默體先志慎簡元良

由是壽皇展拜則命隨行裕陵敷土則命恭代隱然以

神器攸歸面稽列聖寅承對越胥寓深心上天性純孝晨

昏問視養志無違自丁巳春當孝淑睿皇后大事悲深罔極

辨踊逾恒仁宗俯鑒肫誠每值忌辰及清明中元冬至命躬

親行禮用遂孝思上孺慕銜哀屢形章句數十年如一日焉自

密定儲貳後 仁宗保愛彌至屏窺測杜猜疑用意深遠見於

毓慶宮題詠者不啻再三而長夏延涼則有瀛臺讀書之 命仲

春肄武則有南苑習圍之 命以及 經筵聽講紫閣程材乃武

乃文 心傳若揭至於 郊 壇之所報 陵 廟之薦享時復

主聖代行靈承景福十三年戊辰正月 孝穆成皇后升遐 特

命座罩用金黃色等威區別垂爲令典是年十二月復 賜成大

婚禮是爲 孝愼成皇后舊制舉行彌典 皇子扈蹕木蘭十八

年癸酉九月因陰雨減圍 上先期還京而逆匪犯闕之變作

上不揚聖武立平大難偕 皇三子縣愷飛章 行在奏言本月

十五日午刻 子臣等在書房聞各處太監關門總管常永貴等獲

賊二名將近未刻以爲無事商同至儲秀宮給 皇母請 安聞

有賊越牆從內右門西邊入 子臣實出無奈大膽差人至所內取

進撒袋烏槍腰刀惟時外兵未進不料五六賊在養心門對面南

牆外膳房房上從西大牆欲向北竄

子臣

手足失措大膽在宮內

放槍將一賊打墜又有兩三賊仍在牆上一賊手執白旗似有指

揮

子臣

復將執旗賊打墜餘者方不敢上牆

子臣

復至儲秀宮奏

明請

子臣

皇母放心切屬

子臣

三弟不許稍離左右

子臣

至西

長街西廠一帶訪查縣志奕紹成親王儀親王內務府大臣先後

帶領官兵進內

子臣

屬令將內膳房搜捕復得賊二人並派諳達

侍衛在儲秀宮東長街以防不然

子臣

皇母同貴妃等位及子

臣等並九公主仰賴

皇父威福均皆平安伏祈

聖心寬慰時

仁宗旋蹕白澗行宮中途得奏

批答云欣慰覽之卽有恩旨

遂封

上爲智親王增俸萬二千號所御槍曰威烈

諭內閣曰

係內廷皇子一聞有警自用槍擊斃二賊餘始紛紛潛匿實

屬有膽有識乃奏稱大膽無奈詞語謹飭殊覺過當朕垂淚覽之
可嘉之處筆不能宣宮廷內地奉有 祖 考神御 皇后見亦
在宮身先捍衛保護安全實屬忠孝兼備朕於在廷臣工有功必
賞今皇子能如此忠勇自效豈容稍靳恩施此大公之心內外諸
臣當共知感知奮也 上既戡亂禁中功在 社稷而 聖德淵
冲不自滿假謝 恩奏言事在倉卒又無禦賊之人勢不由己幸
叨 天 祖 皇父 皇母鴻福卻賊無事子臣年幼無知於事
後愈思愈恐所有 恩綸獎諭之處子臣有何謀何勇實不敢當
若論忠孝二字子臣之所當然至矣哉有大能謙不矜不伐 聖
人之功超邁前古 聖人之量亦復越尋常矣 上宅心澹定珍
奇玩好之物略不關懷定省餘閒日與詩書相砥礪 仁宗課以
詞翰或呈進歌頌或廣和 天章日衍月增積成巨帙養正書屋

詩文集四十卷麟麟炳炳極宇宙之大觀養正書屋者 仁宗受

聖初元 御書賜 上園居之額也 勉以育德 示以聖功帝

王之學備焉 上祇奉 訓誨身體力行著主敬存誠勤學改過

四箴以自勵臨御後移 璇題於寢殿 前言敬繹顧諟弗忘蓋

聖學欽承用誌終身之慕如此二十三年戊寅 仁宗東巡盛

京 展謁 三陵 命 上隨侍行禮瞻仰 太祖 太宗所藏

法物俾知 締造維艱守成匪易復 御製大禮慶成記首述

高宗密建隆恩卽繼以承 先猷而啓後嗣殆微示付託得人克

繩 祖武之意蓋誕膺多祜 聖 聖相承用能寅紹丕基錫天

下臣庶以無疆之福也○嘉慶二十五年庚辰秋七月戊寅 仁

宗不豫時駕幸灤陽 上隨扈行在額 天虔禱問視彌謹己卯

仁宗疾大漸召御前大臣賽沖阿索特納木多布齋軍機大臣

托津戴均元盧蔭溥文孚總管內務府大臣禧恩和世泰公啓鍾
匣宣示 御書立 上爲皇太子戌刻 仁宗崩 上稽顙大慟
擗踊無算恭視小殮畢號慟仆地良久方起○庚辰 上以依清
曠東直房爲倚廬席地寢苦每日哭奠盡哀○諭軍機大臣等
皇考大行皇帝臨御天下二十五年 深仁厚澤普洽寰區今

巡幸灤陽遽焉

龍馭上賓朕搶地呼天攀號莫及 梓宮爲萬

世閔藏之器此閒並無合制良材朕心益覺難安京城原有豫爲
儲備者著留京王大臣內務府大臣卽派委妥員設法運送前來
飭令晝夜行走能早一刻務趕緊一刻卽將幫蓋底拆開用覆包
裹俟到此閒再行合成均無不可總以迅速爲要萬勿刻遲再朕
三弟五弟俱應速來叩謁 几筵著令其乘車前來但青車恐不
能安速著留京王大臣卽備妥速車輛豫備乘坐以便克期起程

○諭 皇考大行皇帝龍馭上賓朕搶地呼天攀號莫及卽日恭奉梓宮回京沿途 蘆殿並橋梁道路著方受疇卽速豫爲籌備該督受 皇考深恩務盡心妥辦萬不可草率遲誤是爲至要○辛巳尊奉 母后爲 皇太后○命御前侍衛吉倫泰馳驛回京請 皇太后安○晉封惇郡王縣愷爲惇親王封縣愉爲惠郡王○諭軍機大臣等儀親王成親王皆朕之伯恭聞 皇考大行皇帝大事必皆逾情悲感但俱已年高勉加節抑不必遠道來迎均卽在京祇候恭接 梓宮再朕初承大統苦塊之際智慮煩膺儀親王成親王有應行陳善納誨之處當啓牖朕衷毋有所隱○留京王大臣等奏本日卯刻突聞 大行皇帝龍馭上賓慘慟悲切得旨興言及此五內如焚又奏 皇上至孝性成受 大行皇帝付託之重跪求節哀批才疏德薄哀懼日增 聖恩深厚甚懼

有孤 付託之重惟賴爾王大臣輔弼貌躬勉求治道同心同德
仰承 遺訓朕之至願也又奏保攝 聖躬上慰 大行皇帝在
天之靈下答天下臣民之望批曷敢當此又奏查得內務府有乾
隆年間備用枅木 梓宮一分向係拆散收貯便於包裹行走可
期迅速並將 梓宮外槨包妥於本日午刻自京起程批辦理甚
好又奏 梓宮內應用各件俱已檢齊恭齋赴園與惇郡王五阿
哥同看批想必慟絕矣○癸未奉 皇太后懿旨我 大行皇帝
仰承 神器俯育寰區至聖至仁憂勤惕厲於茲二十有五年矣
本年舉行秋獮大典 駐蹕避暑山莊突於二十五日戌刻 龍
馭上賓驚聞之下悲慟搶呼攀號莫及泣思 大行皇帝御極以
來兢兢業業無日不以天下國家爲念今哀邁 升遐嗣位尤爲
重大皇次子智親王仁孝聰睿英武端醇見隨行在自當上膺

付託撫馭黎元但恐倉卒之中 大行皇帝未及明諭而皇次子秉性謙沖素所深知爲特降懿旨傳諭留京王大臣馳寄皇次子卽正尊位以慰 大行皇帝在天之靈以順天下臣民之望 上奉 懿旨愴感靡極恭摺覆 奏本月二十五日 皇父聖躬不豫至戊刻大漸子臣震驚哀慟五中摧裂昏迷失據維時御前大臣軍機大臣內務府大臣恭啓鑄匣有 皇父御書嘉慶四年四月初十日卯初立皇太子殊諭一紙該大臣等合詞請遵 大行皇帝成命以 宗 社爲重繼承大統子臣遜讓至再至三該大臣等固請不已本日恭奉 懿旨命子臣卽正尊位 皇父 皇母 恩慈深厚子臣伏地叩頭感悚不能言喻惟是子臣德薄才疏神器至重實深愧懼惟有勉力圖治以期仰副 恩慈深厚鑄匣所藏 皇父殊諭恭呈懿覽謹繕摺覆奏恭謝 慈恩伏祈

聖母皇太后懿鑒○召在籍翰林院侍講秦承業來京

八月甲申朔辰刻 大行皇帝大殮奉安 梓宮於潛泊敬誠殿

上奏慰 皇太后並慮 慈躬過哀另摺請 安○乙酉諭朕

受 皇考大行皇帝鞠育深恩昊天罔極本年 巡幸豫陽朕沿

途隨扈 聖躬乃遭疾三日遂至大漸搶地呼天追攀莫及敬維

皇考臨御二十五年蕩平寇亂綏靖兆民宵旰勤勞曾無一日

稍紓 聖慮薄海臣黎仰荷 仁帡共享昇平之福今猝遭大故

凡有血氣者悲哀感戀罔非出於至誠況朕之受 恩深重萬倍

恒常者乎欽奉 皇考遺詔喪服仍依舊制二十七日而除朕心

實所難安惟有恪遵古制敬行三年之喪庶幾稍盡哀慕之忱於

萬一天下臣民仍照定例行○越南國王阮福映卒嗣子阮福蛟

遣陪臣詣闕告哀貢方物○丙戌諭方受疇飭知承辦橋道各州

縣不可藉名科派累民○免直隸承德府屬及經過宛平等五縣
明年錢糧○丁亥諭伊古神聖之君厥有顯號鴻稱光昭萬世鉅
典不可易也我 皇考大行皇帝御宇二十五年自初元 受璽
躬聆 皇祖訓政三年孝敬肫誠史冊罕覯洵乎 親政整飭綱
紀儆於有位文勵厥職武詰爾戎於是西南三省逋誅之寇悉就
蕩平萬里鯨波氛翳奄熄數年之間海宇乂安我國家幅員之廣
亘古所無 皇考撫綏中外兢兢業業敬 天法 祖 勤政
愛民 壇 廟大祀舉必 躬親歲謁 橋山終身孺慕陪都再
蒞緬述 前猷 六聖實錄晨興繹誦歲無虛日用人行政之
道咸式遵焉 蒞位之初首杜貢獻崇獎情廉用俾疆吏無敢朘
削以厚民生 披覽章奏 召見臣工盛暑祁寒數十年未嘗一
日或閒 惠愛黎元蠲除賑貸靡有數計拯救河患屢舉大工己

饑已溺之懷恒孜孜焉若恐後時 訓誨宗室 詰誠八旗敝怠
以教臣工除慝以安億兆欽恤庶獄明慎不留斟酌刑章寬嚴必
當隆教養以崇本務任賢能以端治原此皆我 皇考實心實政
天下臣民所共見共聞者也至於 聖學淵深大文炳煥發揮道
奧則旨約六經涵泳性天則義賅四始詩文之集超越古今咸詣
水蘭 躬親肄武修明戎備赫聲濯靈不啓邊功四裔讐服此又
道綜文武統千聖而邁百王者也予以藐躬仰承 遺命寅奉丕
基緬維 皇考功德之隆巍巍蕩蕩莫罄名言宜稽徽美之稱用
備尊親之典敬循禮制恭上 尊諡 廟號著大學士九卿詳察
典禮具奏○戊子頒 大行皇帝遺詔○己丑命議行三年之喪
卻羣臣以日易月之請○以河南儀封漫口准淮南捐銀一百萬
兩豫備工需○辛卯諭本日熱河總管祥紹嵩年呈進食物當卽

斥駁因思各省督撫鹽關向有呈進方物若不豫行宣諭恐仍循
例相率入貢朕方在諒陰之中食處皆所不安著通諭各省督撫
鹽政織造關差等一應貢獻槩行停止卽食品亦不准進呈俟三
年之後再候諭旨○壬辰諭養心殿佛堂供奉 考 妣神牌嘉
慶二年恭奉 皇祖敕旨每代遞遷四年 皇考大行皇帝欽遵
奉移 聖祖仁皇帝 孝恭仁皇后神牌於 壽皇殿奉移 世
宗憲皇帝 孝聖憲皇后神牌於西龕之東恭奉 高宗純皇帝
孝儀純皇后神牌於西龕之西朕祗循 成法不敢有踰應請
世宗憲皇帝 孝聖憲皇后神牌奉移 壽皇殿敬請 高宗
純皇帝 孝儀純皇后神牌奉移於西龕之東俟恭上 皇考
皇妣尊諡後祗造 神牌涓吉供奉於西龕之西用昭妥侑所有
一切派員奉移各事宜著該衙門敬謹豫備其圓明園 安佑宮

亦敬謹照此恭移安奉○癸巳諭古稱三年之喪達乎天子持服
特其一端昨據王大臣等請依舊制以日易月業經降旨明白宣
諭朕受 皇考大行皇帝深恩昊天罔極猝遭大故創鉅痛深惟
有恪守禮經藉申哀悃非以持服三年遂爲盡孝也今王大臣等
復以本朝服制定儀合詞奏請覽奏愈增哀慟敬思雍正十三年
世宗憲皇帝大喪 皇祖高宗純皇帝係持服百日嘉慶四年
皇祖大喪 皇考大行皇帝亦持服百日俱因臣工等籲請再
三未遂 聖志朕孺慕私忱雖切亦何敢有踰舊章不得已勉從
所請恭遇 郊 社 宗廟祀典朝儀一切服色著王大臣等均
查照成例敬謹辦理不必再行瀆請○諭乾隆四十一年十一月
恭奉 皇祖高宗純皇帝諭旨縣字爲民生衣被常稱尤難回避
將來繼體承統者當以縣作 則係不經用之字缺筆亦易等因

欽此今朕當欽遵 成命將御名上一字敬改至臣下循例敬避
上一字著缺一點下一字將心字改寫一畫一撇其奉旨以前所
刻書籍俱無庸追改尋肅親王永錫等奏臨文不諱 聖主不以
爲嫌而臣子之心究多惶悚謹按康熙字典甯字註乃定切引漢
書永以康甯一語與 御名下一字音義相通嗣後文移奏牘恭
請避寫甯字得旨旣知臨文不諱何用瑣瑣仍遵前旨改寫一畫
一撇又奏前代避諱原有改用音相近者批不可爲法○甲午移
直隸南隄九工霸州淀河巡檢駐六工下汎南岸六工霸州州判
駐六工上汎○乙未恭奉 大行皇帝梓宮還京師先一日 上
詣 几筵前行啓奠禮自是日詣 蘆殿朝夕哭奠盡哀○己亥
以橋道穩固加方受疇太子太保餘升賞有差○乙巳 大行皇
帝梓宮至京師奉安於乾清宮 上居上書房苦次自是日至壬

戊每日親詣 几筵前奠獻三次奉 皇太后居弘德殿每日親

詣問 安○丙午 上詣 大行皇帝几筵前行殷奠禮○諭

皇祖高宗純皇帝嬪御存者惟 晉貴人一人宜崇位號以申敬

禮謹尊封爲 晉妃所有應行事宜著該衙門察例具奏○諭

皇考大行皇帝妃嬪承侍宮闈恪恭淑慎均宜加崇位號以表尊

榮 誠貴妃侍奉 皇考最久年齒亦尊謹尊封爲 誠禧皇貴

妃 如妃誕育惠郡王尊封爲 如貴妃 信嬪晉封爲 信妃

恩貴人晉封爲 恩嬪 榮貴人晉封爲 榮嬪 安常在晉

封爲 安嬪所有應行事宜著各該衙門察例具奏○丁未諭悖

親王瑞親王惠郡王釋服後仍著戴用紅絨結頂朝服蟒袍俱用

金黃色○戊申 上詣 大行皇帝几筵前行周月祭禮○大學

士九卿等奏擬上 大行皇帝 廟號 尊諡曰 受天興運敷

化綏猷崇文經武孝恭勤儉端敏英哲睿皇帝天下萬世稱曰

仁宗睿皇帝奏入 上曰廷臣所擬詳慎公允於 皇考聖德神

功實相符合深協朕懷○頒 大行皇帝遺詔於朝鮮琉球暹羅

越南緬甸等國○准發遣吉林黑龍江人犯分別改發新疆及雲

貴兩廣等處著爲令○庚戌 上卽皇帝位於太和殿遣官告祭

天地 太廟 社稷是日詣 大行皇帝梓宮前行祭告禮

詣弘德殿 皇太后前行禮畢出 御殿行禮免宣表頒詔天下

以明年爲道光元年加恩中外罪非常赦所不原者咸赦除之○

諭朕長兄大阿哥早年殤逝朕兄弟僅有五人惓懷同氣著追封

爲郡王應行典禮著宗人府會同禮部內務府酌議具奏尋封爲

穆郡王○諭朕沖齡就傅時原任侍郎萬承風在上書房授讀盡

心講貫深資啓沃宜加崇秩以獎前勞著晉贈禮部尙書銜加恩

追諡該衙門祭例具奏其子監生萬方熙並著賞給舉人准其一體會試以示朕眷懷舊學至意尋奏予祭一次諡文恪○加黃鉞劉鏞之費沖阿孫玉庭蔣攸銛太子少保○辛亥詔停本年秋決○是月賑河南許州地震災貸盛京彰武臺邊門等處被淹兵丁一年錢糧並給修屋費貸巨流河等處一月口糧緩徵江南徐州府屬修埽借用庫銀

九月己未尊 大行皇帝陵曰 昌陵○庚申諭七月二十五日
慟遭 皇考大行皇帝大故彼時軍機大臣敬擬 遺詔朕在諒
闇之中哀慟迫切未經看出錯誤之處朕亦不能辭咎但思軍機
大臣多年承旨所擬自不至有誤及昨內閣繕呈 遺詔副本以
備宮中時閱朕恭讀之下末有 皇祖降生避暑山莊之語因請

皇祖實錄跪讀始知 皇祖於康熙辛卯八月十三日子時

誕生於 雍和宮邸復徧閱 皇祖御製詩集凡言 降生於

雍和宮者三見集中因命大學士曹振鏞協辦大學士尙書伯麟
尙書英和黃鉞傳旨令軍機大臣明白回奏據稱恭查 大行皇
帝御製詩初集第十四卷 萬萬壽節率王公大臣行慶賀禮恭
紀詩註恭載 高宗純皇帝以辛卯歲誕生於山莊都福之庭又
第六卷 萬萬壽節率王公大臣等行慶賀禮恭紀詩註相同至
實錄未經恭閱不能深悉等語朕敬釋 皇考詩內語意係泛
言山莊爲都福之庭並無 誕降山莊之句當日擬註臣工誤會
詩意茲據軍機大臣等稱 實錄未經恭閱尙屬有辭至 皇
祖御製詩集久經頒行天下不得諉爲未讀實屬巧辨除托津戴
均元俱已年老無庸在軍機處行走並不必恭理喪儀與盧蔭溥
文孚一併交部嚴加議處盧蔭溥文孚年力尙強與托津戴均元

行走班次在前者有閒仍留軍機大臣 遺詔布告天下爲萬世徵信豈容稍有舛錯不得不將原委明白宣示中外著將此旨通諭知之尋降托津戴均元四級廬蔭溥文孚五級均留任○諭軍機大臣等據斌靜等奏圖舒克塔什卡倫外之沖巴噶什愛曼布魯特比蘇蘭奇串通薩木薩克之子張格爾滋事賊眾約有三百餘人業將圖舒克塔什卡倫官兵殺傷並將伊斯里克卡倫馬匹搶去其呈報公文馬兵二名被賊匪殺害色普徵額帶同官兵追捕殺賊五十餘名生擒賊八十餘名賊卽紛紛逃竄出卡見調葉爾羌官兵三百名烏什官兵三百名伊犁派兵二千名俟官兵到來卽帶兵進剿等語此事恐斌靜不能辦理色普徵額亦僅能帶兵未能籌畫全局調度得宜著慶祥接奉此旨卽日選派得力將備兵丁星夜兼程馳赴該處將爲首滋事賊匪奮力擒捕訊明

謀叛情由按律嚴辦其餘脅從之犯不可株連妄加殺戮致令回
眾相率惶懼別滋事端是爲至要再此次蘇蘭奇等滋事究因何
起釁是否係內地官兵因事激變並著慶祥到彼後詳細察訪如
有激變情事據實參奏勿得稍有瞻徇其伊犁將軍事務著慶祥
於領隊大臣內擇一老成曉事者令其暫行代辦將此由六百里
諭令知之○命恭纂 大行皇帝實錄○命大學士曹振鏞尙書
黃鉞英和在軍機大臣上行走○王戌以那彥成爲理藩院尙書
調和桂爲倉場侍郎善慶爲禮部左侍郎文孚爲工部右侍郎轉
禧恩爲戶部左侍郎調廉善爲戶部右侍郎那清安爲刑部左侍
郎書敏爲禮部右侍郎以潤德爲盛京兵部侍郎御史遷○命
吏部尙書協辦大學士吳璥督理河南儀封河工調劉鏞之爲吏
部尙書茹棻爲兵部尙書盧蔭溥爲工部尙書黃鉞爲戶部尙書

以汪廷珍爲禮部尙書顧德慶爲左都御史調湯金釗爲吏部左侍郎以吳烜爲禮部右侍郎

由翰林院侍講學士遷

○癸亥奉移

大行皇

帝梓宮於觀德殿

上哀號瞻戀不忍暫離每日親臨奠獻奉

皇太后居後殿

上居永思殿苦次每日問

安○撥銀五十餘

萬兩增培南河隄岸代賑○甲子

上詣

大行皇帝几筵前行

初祭禮○

諭直省大小官員自雍正年間議設養廉由督撫以至

州縣藉以爲辦公之資迄今將屆百年督撫司道俸廉較厚者尙敷公用至府廳州縣養廉止此定額而差務之費捐攤之款日益加增往往有全行坐扣祿入毫無者雖在潔清自好之吏一經履任公事叢集難爲無米之炊勢不得不取給陋規以資挹注而不肖者則以爲少取多取均干吏議轉恣意徵求除辦公之外悉以肥其私橐上司心知通省官吏莫不皆然豈能槩行糾劾遂陽禁

而陰縱之於是箕斂溢取之風日甚一日而閭閻之蓋藏槩耗於官司之朘削民生困敝職此之由與其私以取之何如明以與之朕思國家立制必循名責實始能奉行無弊直省相沿陋規如舟車行戶火耗平餘雜稅存贖鹽當規禮其名不一有此邑有而彼邑無者有彼邑可裁而此邑斷不能裁者與其號爲禁革巧取如常上司可藉以恐嚇屬員小民可藉以控告長吏何如明定章程立以限制使無所藉口乎惟各省情形不同著該督撫督率藩司將所屬陋規逐一清查應存者存應革者革勿博寬厚之名勿爲谿刻之舉務各秉公詳議期於久遠可行或以此之有餘補彼之不足俾府廳州縣足敷辦公而止奏定之後通行飭諭如再有以賠累爲詞於此外多取於民者一經發覺卽行從重治罪不稍寬貸庶廉吏得以措施貪人無從影射此係朕恤吏之心正所以愛

民之意名實不淆吏治清而民生自厚矣○諭向例和碩親王嫡出之子年及歲時封以未入八分公惇親王之子奕續雖未及歲係伊嫡出之子著加恩將奕續封爲未入八分公本月十六日伊釋服後卽賞給頭品頂帶雙眼花翎○諭軍機大臣等本日據斌靜等奏逆犯蘇蘭奇等聚眾滋事前經色普徵額勦斃並生擒一百餘名餘眾二百餘名已竄出卡外見在所謂葉爾羌頭起官兵一百五十名已到派員管帶星馳赴營其二起官兵一百五十名斌靜留守城池色普徵額管帶葉爾羌官兵及索倫錫伯伯克回兵進山追捕並訊據活賊安集延回子邁理特里提普供稱張格爾於本年五月內曾向霍罕伯克愛瑪爾借兵來搶喀什噶爾未允遂糾同蘇蘭奇並圖爾第邁莫特之子胡則會集三百餘人前來滋事將圖舒克塔什卡倫城池燒毀戕害副護軍參領音德布

並蒞兵十三名餘丁一名玉斯圖阿爾圖什六品阿奇木伯克阿
布都爾濟亦被戕害等語慶祥接奉前旨自己帶兵星馳前往相
機剿捕惟是蘇蘭奇係布魯特比因何遽爾生心謀爲不軌欲占
據喀什噶爾城池其中必有起釁根由薩木薩克之事傳聞異詞
張格爾是否果係薩木薩克之子虛實未定圖爾第邁莫特前因
孜牙墩謀逆案內凌遲處死其子胡則數年來逃往何處此次帶
兵前來其意可知慶祥到彼均逐細察訪明確據實速奏至斌靜
前調葉爾羌官兵三百名原爲剿賊今僅令一半隨同色普徵額
前往追捕以一半留守城池城池固係緊要但本城自有官兵防
守看來斌靜竟係恇怯無能留以自衛設色普徵額兵力單弱致
有挫失殊於國體攸關慶祥一到當鼓勵將弁兵丁迅掃賊氛以
靖邊圉勉之其守卡副護軍參領音德布及滿兵伯克等查明實

係禦賊被戕卽行奏請恩施○起松筠爲左副都御史○乙丑諭朕元妃鈕祜祿氏應追封爲皇后所有應行典禮該衙門察例具奏○丙寅諭軍機大臣等據慶祥奏喀什噶爾卡倫外布魯特滋事豫派官兵一摺此事前據斌靜奏到已兩次降旨諭令慶祥前往查辦矣斌靜原奏內稱係蘇蘭奇串通張格爾滋事蘇蘭奇係阿瓦勒之孫博碩輝之子阿瓦勒在乾隆三十年平定烏什叛回時曾經出力博碩輝並曾賞給二品翎頂蘇蘭奇襲職受封安居已久何以此次忽萌異心且僅有眾三百人遽思搶掠城池謀爲不軌亦覺太不自量恐斌靜前奏尙多不實不盡慶祥須詳加訪察並訊獲賊供詞如內地官兵有激變情事或有起釁之由卽行據實參奏不可稍有隱飾又前奏稱有西布察克愛曼布魯特比拜呢雜爾伊里斯莫特等前來告求助剿其情是真是僞亦不可

不防慶祥到彼後察看大局相機妥辦擒緝賊首解散脅從勿妄殺戮以安眾心而靖邊圉是爲至要○調岳齡安爲陝西布政使徐忻爲山東布政使○調童槐爲湖北按察使琦善爲山東按察使斌良爲河南按察使陳廷桂爲陝西按察使北調○丁卯諭嗣後皇子之哈哈珠色行走五年期滿遇有揀選藍翎侍衛准其送挑此次挑選侍衛惇親王瑞親王皇長子之哈哈珠色八人內准挑送四人至皇孫之哈哈珠色四人內准挑送二人著爲令○己巳 上詣 大行皇帝几筵前行大祭禮 上居咸福宮苦次自是閒日親臨奠獻奉 皇太后居景仁宮每日問 安○諭朕久聞外省地方官浮收勒折科斂民財日甚一日而總以俸廉坐扣不敷辦公爲詞朕撫恤黎元豈能置之不問然不戒視成遽繩之以法則地方官之辦公竭蹶亦不免苦累是以昨降諭旨令各該

督撫將所屬陋規逐一清查應存者存應革者革期於久遠可行此朕愛民之心不能不兼以恤吏也然立法伊始尤當計及萬全稍一不慎其後必滋流弊各省地方情形不同其所取陋規亦名目不一而地方官每歲辦公之費又視乎其缺之繁簡總在該督撫藩司悉心查覈就各府州縣情形通盤籌畫須知朕此次降旨交議之意原因愛惜民力爲閭閻多留蓋藏非爲不肖有司頭會箕斂取贏於民也凡議存之項必當酌盈劑虛上無傷乎國體下悉協乎輿情祇期該地方官足敷辦公而止於平日濫收溢取之數有所減無所增方爲允協國家取民之道一絲一粟皆有常制此次議存之款因其相沿已久名爲例禁其實無人不取無地不然與其私以取之何如明以與之且示以限制使此後不敢加增若該地方官視此爲分內應得之項復於此外設法巧取更或以

奉旨准取陋規因之竭民脂膏益無顧忌該督撫不加查察則與朕意大相逕庭朕非姑息之主必當執法懲治不稍寬貸各督撫受國重寄當爲百姓計及久長使官吏共飭廉隅小民永免朘削方爲不負委任慎勿苟且塞責或畏難推諉一聽掩耳盜鈴於民生日敝吏治日偷皆漠然不一動念其各仰體朕意力矢公忠詳查妥議具奏○庚午 上始御西廠幄次引見官員○詔開鄉會恩科於道光元年舉行鄉試二年舉行會試○王申改江南邵伯汎把總爲千總移把總歸三江營管轄揚州營駐防外委駐馬家橋添設馬家橋北壩汎外委二水北汎額外外委一○癸酉諭軍機大臣會同翰林院戶部工部議覆御史陳鴻條奏繕進經史講義及興修水利營田二事輪班繕進經史講義行之日久徒成具文無補實政所駁甚是至興修營田水利雍正年間於近京設局

經理曾著有成效農田爲足食之本而溝洫之利尤大使灌溉有
資宣洩有備卽閒值水旱可資救禦若能於北省多闢水田兼收
南方秔稻之利實於民生有裨所有直隸境內著方受疇飭委妥
員相度各河淀水勢倣照雍正年間成規設法經理並多方勸導
使水田歲有增墾收穫漸多則小民必樂於從事其山東山西河
南並著該督撫各就境內一體籌畫其可以經理水田之處各勸
諭農民次第興舉需之歲月以觀其成不可視爲具文用副朕惠
民重食至意○丁丑諭軍機大臣會同宗人府刑部審擬豫親王
裕興強姦使女寅格自縊身死一案國家法令王公與庶民所共
強姦已成致斃人命罪犯至重裕興身係宗室襲爵親王乃不自
愛惜恣意妄爲大干法紀若從末減則齊民犯此者又將何以治
之且當國服未除親喪未滿之日而裕興輒動於惡不忠不孝罪

孰大焉朕不得已不能不執法懲治著照永錫等所擬裕興卽革去王爵交宗人府折圈空室三年期滿釋放餘俱照擬完結其承襲豫親王著交宗人府照例辦理○戊寅 上詣觀德殿 大行皇帝几筵前行再周月祭禮○追封長公主爲端憫固倫公主○命督撫切實奏保文武員弁○壬午諭提督楊遇春屢著勞績忠悃可嘉著賞給太子少保銜並賞戴雙眼花翎○是月加賑河南睢州等七州廳縣水災並給睢州等四州縣一月口糧貸陝西永壽雹災籽種蠲緩河南睢州等九州縣新舊額賦有差

東華續錄

道光二

臣王先謙敬編

臣周嗣蕃恭校

冬十月甲申朔裁各省陳設器玩等貢○丙戌諭稽查三庫御史係近年所設是否有益並著軍機大臣會同都察院議奏尋議戶部三庫向由江南道御史輪往稽查嘉慶二十五年御史柏清額奏請每庫各派御史一員眼同收放部議准行今若裁撤仍歸江南道御史稽查恐事無專責請三庫仍派滿漢科道各一員稽查按年更換報可○裁稽查軍機處御史○丁亥諭近日風氣競尚浮夸國家定制凡婚葬祭祀官員士庶各有一定規制若以侈靡互相矜詡動致非禮僭越其有關於風俗人心者甚大亟宜嚴申禁令將民間婚喪等事悉照會典規條刊諭務令祇遵不得習尚

浮華以副朕敦本務實至意○諭本日降旨派出守護 昌陵大臣內尙書景安蘇楞額並無過失因念伊二人俱年近八旬若令辦理部務恐精神不能周到或致因公獲咎轉非保全之道伊二人俱受 皇考深恩俾得依侍 橋山藉伸忱悃想伊等自必知

感也○戊子調英和爲戶部尙書那彥成爲吏部尙書穆克登額

爲工部尙書以普恭爲禮部尙書松筠爲左都御史

由左副都御史遷

○

以和世泰爲理藩院尙書

由總管內務府大臣遷

○己丑以故追封郡王貝勒

勒縣勲孫鎮國將軍載銳襲貝勒○庚寅再撥部庫銀六十萬兩

備河南儀封工需○申禁河務積弊○辛卯鑄道光錢○乙未命

已革吏部右侍郎周系英來京以四品京堂候補○免齊齊哈爾

等處被水額賦○丙申實授繼昌廣西布政使○丁酉以已革豫

親王裕興弟裕全襲爵○庚子移四川成縣龍茂道駐成都兼管

水利○除江南狼山鎮坍沒牧馬地賦○以凱音布爲左副都御

史

侯補戶部主事
前吏部侍郎

○甲辰恭上 大行皇帝尊諡 廟號翌日頒

詔天下覃恩有差○諭麓親王成親王係朕之伯年齒亦高嗣後

尋常召對及三年後內廷宴資均無庸叩拜至坤寧宮賜食祭肉

於朕前亦不必隨眾叩拜遇有賞賜物件具摺謝恩不必當面叩

首二王伯無得謙抑過當反失朕心○改雲南騰越州爲直隸廳

○丙午諭軍機大臣六部議覆整飭部務條陳一摺所議甚是六

部律令務在持其大綱則政清而易理外省庶務原皆責成於地

方官此在督撫分別賢能庸劣舉錯公明自收得人之效其或不

效則督撫豈能辭咎部中多立科條州縣無日不奉行具文轉荒

其教養不務於事何益而公罪繁多賢吏或因此廢黜不肖者巧

於規避部書得以舞文納賄皆由於此嘉慶十八年曾 敕吏兵

二部刪減例條該部未能實力遵行又諭題調要缺不計因公處分而該部續議章程仍多牽混殊不知公罪從嚴則中材以下之官益多巧避嚴其經徵處分則多墊欠而那新掩舊卽成虧空嚴其承組處分則多諱盜而縱惡養姦轉貽大患故曰徒法不能以自行著吏兵二部各將處分則例悉心確覈於各條下皆註明公罪私罪字樣其公罪有至降調革職非事關重大者酌改從寬各部煩苛無當處分例文互商裁汰務歸簡明其公罪處分除盜案及正項錢糧停升外餘皆不呈推升至題調要缺則一切因公處分皆無庸計算各纂成例冊呈覽至六部事務繁繁一事到部無論題奏咨行皆當細心確覈固不當遲延積壓亦斷不能各限以五日而畢堂官不能每日全行進署若有緊要事件禁止私宅稟商勢必坐待以致延誤除弊之道殊不在此○戊申上詣觀

德殿

仁宗睿皇帝几筵前行三周月祭禮○庚戌諭從前軍機

處滿漢章京皆由軍機大臣於內閣等衙門傳取嘉慶四年改由內閣六部理藩院保送引見嗣後將保送人員先令軍機大臣考試分別去取帶領引見其記名者挨次傳補立法至爲允當惟大員子弟設有回避之例殊可不必防弊之道初不在此如大臣子弟有挑入軍機處者藉以學習教政未嘗不可造就人材嗣後保送軍機章京著無庸回避大員子弟其軍機章京有升通政司副使大理寺少卿及補授科道者卽回本衙門行走著仍照舊例行○是月賑江南徽州安徽泗州等八州縣及屯衛水災旱災給浙江蕭山等三十三縣貧民口糧並修屋費

十一月甲寅朔諭軍機大臣等軍機大臣會同兵部議覆裁減名糧條陳一摺國家爲民設兵民出賦稅以養兵兵任操防以衛民

其事相權而行我朝百數十年以來具有常制而兵額歷有增添裁減乾隆四十六年添設武職養廉案內將從前虛缺名糧槩募實兵計增兵六萬餘名其數較多歷今三十餘年帑項多用至四千餘萬嘉慶十九年會 敕下各省酌加裁減維時山西等省共裁兵一萬五千四百餘名又改馬戰兵爲步守兵一千二百餘名每歲經費視乾隆年間所添者節減四分之一此因各省險夷衝僻邊腹情形不一事閱數十年亦復今昔異宜此時若悉復乾隆年間未添名糧原額其是否可行原難懸揣然各省見在額兵六十餘萬據所請汰歸所添之半亦僅百分之二豈無可以抽裁之處著交該督撫詳察地方情形無論差操各兵凡在可省者酌加裁減不必留冗兵以糜餉亦不可因節費而裁有用之兵各悉心覈定妥議具奏○丙辰 上詣觀德殿 仁宗睿皇帝几筵前行

百日大祭禮釋縞素○免直隸玉田等三縣建蓋行宮地畝銀米

○庚申召趙文鴻來京以陶澍爲山西按察使由四川○召章

凱來京以潘恭辰爲廣西按察使由雲南○辛酉免兩淮節年未

解玉貢折價銀一百六十餘萬兩並展緩積欠各款○乙丑上

奉皇太后居壽康宮問安視膳自是以爲常○丙寅上

詣觀德殿仁宗睿皇帝几筵前行冬至大祭禮○戊辰召陳桂

生來京以魏元煜爲江蘇巡撫由廣東布政使○召李堯棟來京以左

輔爲湖南巡撫由布政使○己巳以程祖洛爲湖南布政使葉世倬

爲江西按察使由福建臺道○以汪如淵爲廣東布政使由順天府尹

○裁貴州興義府歸化廳屬土外委土守備○辛未申諭姚祖同

迅挑河南儀封引河○壬申賜昌伊蘇等三十七人武進士及第

出身有差○諭武科規制於馬步射之外試以開弓舞刀擲石以

驗技勇由來已久嗣於嘉慶十八年議令滿洲蒙古旗人與漢軍旗人一體應試滿洲蒙古舊例止試馬步射硬弓遂將舞刀事一律停止今思技勇內既向有舞刀一項滿洲蒙古士子自應一體練習亦不迫以時日著自道光三年爲始凡滿洲蒙古漢軍漢人之應童試者俱仍試以舞刀至五年鄉試六年會試均已嫻熟一體考試以復舊制○癸酉以松筠爲熱河都統誠安爲左都御史由熱河都統遷○甲戌以誠安爲鑲紅旗漢軍都統文孚爲左都御史那清安爲工部右侍郎那彥寶爲刑部左侍郎以常英爲理藩院右侍郎由太常寺少卿遷○添建廣東三水縣蘆包汛卡撥前山營外委駐守○予內閣六部行走正途人員正俸○丁丑諭侍講學士顧莼奏松筠宜仍置左右一摺狂謬怪誕已極朕擢松筠於降謫之餘先用爲左都御史又任以熱河都統量能授職自有權衡何分

諭從前內外見任滿大臣官員之弟兄子孫越五年考覈一次挑取侍衛拜唐阿當差原以侍衛拜唐阿係體面差使將大臣官員子弟挑取則伊等熟習清語騎射而官差冀可得人也自嘉慶二十一年查辦以來今已將及五載又屆應行查辦之時惟思該大臣官員子弟之中亦有不同之處或係身體單弱馬上平常或因自幼讀書一時不能學習騎射似此者卽將伊等挑取侍衛拜唐阿又安能得力理宜酌量變通嗣後在京之文職大臣自三品以上武職大臣自二品以上在外交職自總督至臬司武職自將軍提督至總兵該大臣官員之弟兄子孫中如年已及歲與侍衛拜唐阿差使相宜遇五年查辦之時情願挑者該大臣等仍照前例咨報本旗由該旗造冊咨送軍機處彙齊具奏經朕指名查取帶領引見儻若身體單弱而有殘疾或騎射平常未便挑取者該大

臣等卽據實報明該旗轉行軍機處均准聽其自便該旗亦不必
催取名字用示朕曲加量才器使旗僕之意○庚寅以河南儀封
漫口命睢州等六廳州縣加設粥廠煮賑兩月○壬辰諭軍機大
臣等本日卓秉恬奏陳川陝楚老林情形據稱由陝西之略陽鳳
縣東經寶雞等縣至湖北之鄖西中間高山深谷統謂之南山老
林由陝西之甯羌褒城東經四川之南江等縣陝西之紫陽等縣
至湖北之竹山等縣中間高山深谷總謂之巴山老林老林之中
地方遼闊宜種包穀蕎麥燕麥稻糧極微客民給地主錢數串卽
可租種數溝數嶺江廣黔楚川陝之無業者僑寓其中以數百萬
計墾荒種地架屋數椽卽可棲身謂之棚民種地之外多資木箱
鹽井鐵廠紙廠煤廠傭工爲生惟人聚旣多則良莠莫辨不安本
分者一遇旱澇之時糧價昂貴傭作無資一二奸民倡之以喫大

戶爲名蟻附蜂起無所畏忌山內州縣大者周圍一二千里小亦五六百里遇有事必數日始至其處糾結者旣難以輕動遠颺者又莫可追捕且省各有界賊或踰境而免官難越境而謀各處踣會城甚遠若三省大吏往返咨商州縣奉飭恒在數月以後故區畫老林之策當合三省共議於扼要之地專設大員控制如福建之臺灣廣東之雷瓊湖南之鳳凰永綬等廳皆有道員駐紮其地况老林險隘棚民聚散無定雖陝安道川東道安襄鄖荆道未嘗不分轄其地而地界旣分官易推諉查鄖陽地方明季曾設撫治大員嗣經裁撤見經生齒日繁若不妥爲措置必致日久生事等語川陝楚老林地連三省幅員遼闊山川險阻棚民易致滋事宜如何彈壓撫綏之處著蔣攸銑朱勳毓岱確勘情形悉心籌畫會同定議具奏○癸巳加上 孝敬憲皇后 孝聖憲皇后 高宗

純皇帝 孝賢純皇后

孝儀純皇后尊諡

○乙未諭朕初自熱

河回京時召見英和詢以政治據奏各省府州縣養廉不敷辦公莫不取給陋規日益加增不若通諭督撫藩司逐一查明分別應存應革定以限制彼時朕在諒陰之中甫奉 皇考仁宗睿皇帝梓宮回京心緒舊亂又值初親政事於天下吏治民生情性未悉英和人本明白性復敢言聽其言似爲近理因降旨令各督撫體察情形詳議具奏諭旨甫下卽據湯金釗陳官俊汪廷珍先後陳奏皆以此事爲不可行會再降明諭以朕意本以愛民不能不兼恤吏務當計及萬全不可重滋流弊朕心已悟此舉之非矣嗣方受囑來京首先詢及卽奏稱格礙難行昨蔣攸銛入對更力陳其不可本日又據孫玉庭等奏稱直省陋規本干例禁方今府廳州縣固不能不藉地方舊有之出息以充辦公之需然未聞准其明

取於民垂爲令甲者且爲官吏制用而查及舟車行戶事涉瑣屑尤失政體清查陋規後來之獲益未覩而目前之紛擾已甚輿情不協國體攸關等語所言尤爲剴切詳明此事不但無益於民生抑且有傷於國體幸而內外臣工知其不可尙肯據實駁正若皆緘默不言聽其舛誤其失可勝言乎朕非飾非文過之主今旣洞悉其弊則遷善改過猶恐不及著卽明白宣示各督撫停止查辦惟在各大吏正己率屬獎廉黜貪如有苛取病民之事立加黜革釐正斯吏治激清民生日臻饒裕矣至英和此奏雖誤然其心究係爲公起見但於外省情形未能周知以致冒昧建言朕於科道條陳之事有窒礙難行者尙不加以譴責此時若將英和遽下更議恐在廷大臣以言爲戒轉非朕虛衷延訪之意惟若仍留樞密之地恐不足以服眾心英和著無庸在軍機大臣上行走其餘一

切管項俱照舊供職英和非無天良之人自必知感知奮也將此
通諭中外知之○丙申諭昨日明降諭旨停止清查直省陋規矣
因是思及爲君之難倍增乾惕世有剛愎自用拒諫矜己者固爲
不善矣若不能辨別是非繁行聽納必致政出多門紀綱紊亂甚
則朝令夕改莫知適從如是日漸月積相習成風雖有忠臣志士
亦必緘口結舌國政尙可問乎故清查陋規一事雖係英和建白
實朕不愼不敏之故彼時何難三思博訪而後宣也然諸臣亦當
諒朕之心英和受 皇考特達深恩任事有年朕亦知其才力可
取辦事認真不避嫌怨朕擢英和於軍機者此也不料英和聽信
邪言謂清查陋規有益於國計民生率爾陳奏在伊實係因公起
見並無別故總由朕審度不明幾致誤事朕斷不肯委過臣下亦
不肯文過遂非幸朝有諍臣連章入告使朕胸中黑白分明而又

無傷於政體朕不勝欣悅之至汪廷珍湯金釗方受囑蔣攸銘陳
官俊俱著交部議敘孫玉庭具摺陳辨尤爲剴切通達直言無隱
可謂公忠體國之大臣矣著交部從優議敘以爲竭忠盡職者勸
將此通諭中外知之○諭山東運河事務仍歸河東河道總督兼
管○召吳邦慶來京起李鴻賓爲安徽巡撫東河總督○丁酉
河南儀封漫口合龍予吳璈議敘賞署河東河道總督張文浩二
品頂戴○調嵩孚爲山西布政使邱樹棠爲江西布政使○召祝
慶承來京調屠之申爲直隸布政使以盧坤爲甘肅布政使鄧廷
楨爲湖北按察使由陝西西安○壬寅尊封 高宗純皇帝晉貴
人傅察氏爲 晉妃 仁宗睿皇帝誠貴妃劉佳氏爲 誠禧皇
貴妃如妃鈕祜祿氏爲 如貴妃信嬪劉佳氏爲 信妃○甲辰
添設吉林阿勒楚喀地方無品級筆帖式及委官各二員○召麟

祥來京以溫承惠爲湖北布政使

已革山東按察使

○召敦良來京調誠

端爲湖北按察使以徐承恩爲甘肅按察使

由江蘇遷

○乙巳

上詣觀德殿

仁宗睿皇帝几筵前行歲暮大祭禮

○丙午尊封

仁宗睿皇帝恩貴人烏雅氏爲

恩嬪榮貴人梁氏爲

榮嬪

安常在蘇完尼瓜爾佳氏爲

安嬪

○免長蘆退商積欠攤補未

繳銀二百九十餘萬兩○召張映漢來京以陳若霖爲湖廣總督

帥承瀛爲浙江巡撫轉韓文綺爲刑部左侍郎以王鼎署刑部右

侍郎

由戶部侍郎兼署

○調嵩孚爲浙江布政使以葉世倬爲山西布政

使嵩溥爲江西按察使

由陝西遷

○己酉以纂輯新疆議略賞已

革翰林院編修徐松內閣中書○是歲朝鮮琉球來貢

東華續錄

道光三

臣王先謙敬編

臣周麟蕃恭校

道光元年辛巳春正月甲寅命明安泰以四品京堂用調廉敬爲江蘇按察使以鄭裕國爲廣東按察使由福建補道選○丙辰賞刑部員外郎初彭齡禮部侍郎銜○丁巳諭軍機大臣等慶祥奏設法擒捕逆匪並密陳回疆情形各一摺張格爾旣實有其人藉名和卓後裔冀圖煽惑回眾蘇蘭奇胡則二犯預知逆情巴衣巴哈什蒙達拉克等倡先助逆均應按名捕獲以正刑誅慶祥密派妥幹之員前往布魯特各愛曼分投偵訪不洩機宜不動聲色務期必獲並諭知霍罕伯克愛瑪爾令其獻賊立功所辦皆是見在蒙達拉克已報拏獲係於某處就擒被何人所拏著附報具奏慶祥於蒙

達拉克解到後卽親提研訊務將此次起釁緣由及見在張格爾
蘇蘭奇胡則等下落令其逐一供吐卽跟蹤設法擒捕新疆開闢
以來已六十餘年休養生息邊圉無事旗民回部富庶恬熙總當
安不忘危使各安居樂業該將軍有總統之責凡都統參贊以下
廉能者不可壅於上聞貪劣者尤不可稍爲回護鎮守邊疆必先
藉有可信任之人若待其債事貽患卽立繩以法已不如早爲辦
理見在喀什噶爾參贊大臣一缺已簡任武隆阿其人精力富強
結實可靠到任後慶祥仍細心查訪將勝任與否據實奏聞其新
疆地方隨時有應調劑者亦可遇便奏聞嗣後新疆南北各城參
贊幫辦領隊各大臣有由革職效力人員錄用者准其卽支食養
廉一半無庸月支鹽菜銀五兩調任加銜後卽准全支養廉慶祥
受朕委任惟當勉之又勉刻刻留心勿但以空言塞責也○戊午

定京旗閒散分駐吉林屯田章程○裁 天壇翼衛官七十二員
兵一千九十名○先是御史陳鴻奏鹽政衙門需索規費請將兩
浙長蘆鹽政衙門裁歸督撫管理命大學士軍機大臣戶部會議
至是議上得旨托津等會議浙省鹽務改復舊制一摺浙省鹽法
做壞不能不隨時變通著照所議將浙省鹽務仍歸浙江巡撫兼
管其浙江鹽政一缺仍改爲杭州織造兼管南北新關稅務廣泰
著補授杭州織造其鹽務正雜各款及關稅數目著新任巡撫帥
承瀛會同廣泰分別交代清楚運使以下等官及一應改復事宜
並著帥承瀛於履任後妥議具奏至長蘆鹽政立法已久無庸更
議更張其所議嚴禁掣規重斤科派供應等款並實力緝私各事
宜著各該督撫鹽政詳加體察認真整頓務使積弊廓除以肅鹺
政○己未以文孚爲禮部尙書那清安署左都御史

用工部右侍郎署○

丙寅命前任江甯布政使恒敬以三品京堂候補○丁卯越南國王阮福駿請遣使進香表賀進方物詔止之○庚午命前任江蘇巡撫陳桂生以三品京堂候補○辛未裁陝甘綠營馬兵三千六百三十名以步兵改補○壬申以修治橋道免宛平等四縣及涿州易州本年額賦○癸酉命前任湖南巡撫李堯棟以三品京堂候補○甲戌嚴禁濫用非刑○乙亥彗星出西方詔兩河防護隄工○庚辰 上御紫光閣閱大員子弟騎射○賜廓爾喀額爾德尼王熱尊達爾畢噶爾瑪薩野敕諭曰昨據駐藏大臣轉奏爾聞仁宗睿皇帝升遐卽率領部落人等哀叩成服並呈進奏書金綫段一摺 仁宗睿皇帝臨御二十五年撫綏寰區推廣 皇仁無有不被爾廓爾喀仰承 殊恩至優至渥今聞 升遐卽率闔境人等成服向上叩拜焚香念經實屬至誠朕甚嘉焉朕遠遣

仁宗睿皇帝大故雖孝思不匱時深哀慟仰賴 天恩朕躬尙屬
康健專此曉諭並降詔書賞給熱尊達爾畢噶爾瑪薩野金花段
一疋花段一疋八絲段一疋盒子一箇大荷包一對小荷包四箇
火鐮荷包一箇嗣後熱尊達爾畢噶爾瑪薩野感戴世受 厚恩
照例妥理夷務嚴督屬下和睦鄰封益加奮勉永受朕恩毋怠特
諭○松筠以新疆識略進 御製序文

二月壬午朔日有食之○乙酉諭各直省修復社倉義倉○辛卯

雲南永北廳屬夷匪滋事命總督慶保勦之○壬辰免山西額解

錫斤改派福建湖北辦解○乙未溫承惠以年力就衰降六部郎

中以廉敬爲湖北布政使調誠端爲江蘇按察使嵩溥爲湖南按

察使以戴敦元爲江西按察使

由廣東高廉道遷

○戊戌協辦大學士吳

璚以疾乞休允之○劉寶第以不勝任休致以湯國楨爲雲南按

察使

由鹽道遷

○己亥以張映漢爲刑部右侍郎

前任湖廣總督

○庚子修

昭陵月牙城

○命孫玉庭協辦大學士仍留兩江總督任○加陝

甘總督長齡太子少保○辛丑以故怡親王載坊弟載垣襲爵○

壬寅

上御紫光閣閱宗室馬步射挑選侍衛○甲辰免江西豐

城等六縣節年民借籽種口糧逋穀○丙午撥廣東陸路提標外

委二歸善縣守備一老隆汎外委一分駐連平州河源縣龍川縣

城移龍川汎千總駐老隆汎並撥兵隸之○己酉諭慶祥奏遵旨

查明逆回張格爾等滋事緣由及審擬回子伯克控告斌靜家人

張得幅等索詐等款各一摺張格爾糾約蘇蘭奇等滋事實因窮

苦起意搶掠並非由斌靜激變見據眾伯克出具甘結尙屬可信

惟斌靜以參贊大臣鎮守邊疆年老昏愎行止乖方於家人廢員

等通同婪索伯克等贓物並恐嚇陵辱以致眾心不服毫無覺察

實屬孤恩溺職除賈柄張得幅二犯業經正法外斌靜著發往黑龍江效力贖罪色普徵額到任未久卽帶兵在外其失察情尙可原業經革職已足蔽辜著免其置讓綏善身係職官結交奴僕飲酒宿娼卑鄙無恥著枷號一年滿日發往伊犁效力贖罪

三月辛亥朔諭欽天監奏本年四月初一日月合璧五星聯珠朕惟懸象著明肇先七政史冊載高陽氏時五星聚於營室漢代聚於東井宋世聚於奎皆紀爲難逢之瑞第日月五星麗天而下行本有度卽同明共貫亦祇會逢其適可以推測而知我朝 列聖

相承雍正乾隆嘉慶年間天章屢耀仰承 昊佑 景運隆長茲

朕初元復遘嘉會敬惟事 天之道遇儆則當思修省徵祥惟益

勵寅恭朕嗣統以來兢兢業業猶恐弗及何敢矜言符瑞稍啓侈心古云國家以賢才爲寶豐年爲瑞惟當夙夜孜孜與內外臣工

共圖上理期於政通人和薄海羣生咸登康阜以丕揚我 列祖
無疆之庥仰副我 皇考付託之重斯願克遂其爲休應孰有大
於是者乎此事不必宣付史館用示朕崇實黜浮至意○癸丑以
仁宗睿皇帝梓宮奉安 山陵再免經過地方本年旗租並給
平毀麥田籽種銀○甲寅清明節 上詣 仁宗睿皇帝几筵前
供奠○乙卯 上臨故慶僖親王永璘殯所賜奠○己未 上詣
觀德殿 仁宗睿皇帝几筵前行祖奠禮○辛酉 仁宗睿皇帝
梓宮發引 上奉 皇太后恭送 昌陵辟鑾○壬戌諭軍機大
臣等據玉麟等奏廓爾喀王懇請遣使朝貢一摺廓爾喀王請進
登極表貢情詞懇切自應准其恭進惟來年卽係該國例貢之期
所有呈進表貢著令其統俟道光二年例貢時一同恭齎來京呈
進以省跋涉之勞文幹等卽檄諭該國王欽遵辦理○癸亥諭軍

機大臣等慶保奏馳抵大姚與提臣札商分別勦辦永北大姚兩處夷匪情形一摺此案永北逆夷傅添貴等哄動愚夷假託妖言勾結滋事見在已有七八千人其偷渡過江在大姚焚劫滋擾者亦有三四千人雖其中多有裹脅烏合之衆然賊數已爲不少先因各處派調官兵未集自不便輕率進勦該督等續調官兵合計先後已有八千餘名更加以土練四千兵勢亦不爲不厚該督當知會提督張鳳相度機宜分路進勦仍一面防護完善地方安撫夷民勿使再有裹脅總須一鼓作氣痛加勦辦使賊匪震懾兵威則脅從者自必聞風解散首逆勢孤易於成擒斷不可遷延時日致令滋蔓難圖至滇省每有軍務多得土練之力朕所深知該土司素來貧乏自應給予鹽菜口糧俾各踴躍從事惟當嚴實辦理毋任冒濫其楚雄協將沙泰於夷匪偷渡過江不能先事防範本

應革職治罪惟此時正在進勅著先行摘去頂帶令其帶兵勦賊

以觀後效又據另片奏見已購獲梅依者十並要犯沙季得著卽

確切研訊此次爲首之犯是否止係傅添貴及伊妻父陳添培抑

或更有同謀倡逆之犯永北大姚兩處共有首逆幾名附逆者實

有若干人究係因何起釁敢作不靖訊悉各供卽行附報具奏○

裁貴州郎岱廳屬六枝土把總○乙丑賞故兵部右侍郎溫汝适

子舉人承悌進士一體殿試○丙寅 上謁 泰陵 泰東陵

昌陵 隆恩殿恭奉 冊寶上 孝淑睿皇后尊諡曰 孝淑端

和仁莊慈懿光天佑聖睿皇后○丁卯 仁宗睿皇帝梓宮至

昌陵暫安於 隆恩殿○命成都將軍呢瑪善馳赴雲南幫辦軍

務○己巳以阿霖爲直隸按察使由熱河道遷○癸酉午刻大葬 仁

宗睿皇帝於 昌陵○甲戌 上回鑾○加托津曹振鏞太子太

傳○丁丑 上奉 皇太后還京師○戊寅恭奉 仁宗睿皇帝
孝淑睿皇后升祔太廟○己卯以升祔 太廟禮成頒詔天下
覃恩有差○是月貸山西岢嵐等十州縣甘肅狄道等五州縣上
年災民倉穀口糧

夏四月壬午安奉

仁宗睿皇帝

孝淑睿皇后御容於

壽皇

殿○丙戌常雩祀

天於

圓丘恭奉

仁宗睿皇帝配享○丁

亥以奉

仁宗睿皇帝配

天禮成頒詔天下覃恩有差○江蘇

巡撫魏元煜奏謝恩蔭得旨今歲孫玉庭入覲經朕連日召見徧
詢民間疾苦地方利弊敷奏詳明直陳無隱可謂國之柱石公忠
之懷見於言表且年已七旬精力未覺稍衰朕甚嘉幸凡南省諸
務汝宜協衷辦理以期官飭民安我君臣共享昇平之福且汝之
聲望入在朕懷今而後若能效法孫玉庭之居官任事始終如一

何煥不受朕恩又何患不爲名臣矣須加愼勉○庚寅授呢瑪善

爲欽差大臣督辦雲南永北軍務○除直隸宛平縣屬建蓋行宮

占用民田額賦○實授那清安左都御史調阿克富阿爲工部右

侍郎以成書爲兵部左侍郎

由太常寺少卿遷

○癸巳諭軍機大臣等前

因永北大姚夷匪滋事已閱三月勦辦尙無端緒逆夷裹脅日眾

特授呢瑪善爲欽差大臣總辦軍務茲據慶保奏大姚一路夷匪

業經分路進勦大獲勝仗將首逆陳添培並緊要賊目刁周等已

按名擒獲旬日之內卽可將賊巢拔洗淨盡其芝蔴莊一路夷匪

亦經張鳳督率將弁分投攻勦生擒活賊多名並將賊寨燒毀此

時惟有永北一路首逆瞎眼唐老大等屯聚公母二寨負隅抗拒

慶保等卽日將大姚餘匪勦盡卽會合兵練齊赴永北進勦呢瑪

善見已奏報起程途次接奉此旨毋庸前往大姚著取路徑赴永

北軍營彼時慶保如尙未將公母二寨大股賊眾悉數殲除該將軍卽會同慶保商籌辦理迅速蔽功若到彼後慶保等已將逆夷撲滅亦尙有搜剿餘匪安撫難民各事宜並前旨飭查之件該將軍卽在彼駐紮查辦至呢瑪善所奏指調貴州營精兵一節滇省先後奏調官兵一萬餘名土練五千餘名刻下均會集永北以之攻剿公母寨賊匪諒已足敷剿辦昨所調貴州兵五千名見已降旨停止呢瑪善到彼察看情形如兵力實有不敷無庸先行具奏卽就近知會羅思舉將貴西兵或調派千餘名或數百名令羅思舉管帶前往協剿如可不需卽無庸飭調該將軍酌籌妥辦統俟軍務全竣再奏明回成都本任可也○大學士三等侯明亮以疾致仕命在家食俸○裁陝西提鎮所屬遊擊一都司五守備四增設千總二把總一○增設山東曹州鎮營守備一千總外委各二

把總額外外委各四單縣營參將守備千總把總各一外委二額
外外委四隸曹州鎮轄撥鉅野營所轄單縣汛弁兵歸新設之單
縣營補選鉅野營把總一並額兵歸單縣營參將兼轄添設曹州
桃源營守備外委額外外委各一改原設千總爲守備隸曹右營
兼轄添設曹州劉家口汛千總外委各一隸曹中營轄添設兗州
鎮營千總三把總四沂州營把總二外委額外外委各一郟城縣
紅花埠汛千總外委各一隸臺莊營轄○丙申復未經散館一甲
進士與考試差例○庚子恭建 仁宗睿皇帝聖德神功碑○甲
辰慶保等奏勦洗大姚拉古賊巢全境肅清永北首逆瞻眼唐老
大就擒○乙巳諭昨據軍機處奏和闐葉爾羌每歲照例應進貢
玉業經解到一摺前自平定新疆以後和闐葉爾羌每歲採進貢
玉四千餘斤嘉慶十七年因造辦處所貯之玉甚屬豐足減額每

歲採進二千斤今查造辦處所貯之玉尙多足以敷用著交和蘭
葉爾羌辦事大臣等將此項每歲應進貢玉暫行停採○丁未
上詣 大高殿祈雨○己酉雨

五月乙卯內閣學士朱士彥以疾免○丁巳諭吏部奏查明在部
候選未入流人數過多請將直隸省暫停分發未入流一項仍照
舊例發往一摺各省試用佐雜人數過多補缺無期閒住會城旅
食不繼因而作奸犯科之事比比皆然若不量爲變通仍令接踵
而往實於仕風有礙其直隸奏請停止分發亦係不得已之調劑
但不激其源而塞其流止可行之於暫而不能行之於久夫佐雜
之職雖微亦爲佐理民事而設與其兼容並包而聽其壅塞何如
嚴覈約選俾就疏通著直省督撫各將試用佐雜人員詳加甄別
其實在庸猥陋劣不堪造就者槩行沙汰則才能出眾之員自可

及時自效卽分發續往者亦不至受積壓之累行之數年將試用
候選均可不虞冗滯豈不愈於穀稗糴雜陳陳相因乎其直隸未
入一項仍著暫停分發○戊午撥江南藩庫銀四十五萬六千兩
給海州等州縣展賑○己未增設盛京昌圖廳照磨一○命伯麟
爲體仁閣大學士兼管兵部以長齡協辦大學士仍留陝甘總督
任○癸亥詔停本年秋決○丙寅命廣西按察使潘恭辰冊封越
南國王阮福暎○己巳諭御史許乃濟奏保舉孝廉方正請覈實
奉行一摺國家頒發明詔令府州縣衛保舉孝廉方正及薦舉才
品優長之士原以廣勵人材冀收得賢之效乃比來外省視爲不
急之務或數郡不舉一人其所舉者又或牽於情賄漫以衰庸充
數以致此事竟成具文殊失拔滯顯幽之義夫鄉舉里選古有其
制天下之大豈無遺才此次著各直省督撫各飭所屬悉心採訪

務得操履純潔才猷傑出物望允孚可備國家任使者登諸薦牘
其行誼幹略各於名冊內切實註明咨部引見以備錄用不得託
言矜慎率以無人可舉爲辭若以僞亂眞所舉不公則國有常罰
諒各督撫亦不肯出此也○以松筠爲兵部尙書由熱河統還○裁

北郊大祀翊衛官二十八員兵四百名 雍和宮翊衛官十五員

兵四十名○庚午調廉善爲吏部左侍郎成書爲戶部右侍郎轉

哈豐阿爲兵部左侍郎調常英爲兵部右侍郎以裕恩爲理藩院

右侍郎由副都統還○壬申夏至祭 地於 方澤恭奉 仁宗睿皇

帝配享○癸酉諭呢瑪善等奏永北軍營節次拏獲首夥匪犯分

別辦理地方妥謐並大姚接獲餘匪究出緊要賊目各一摺雲南

永北廳土司所屬野夷因該土司目把將地土典賣與漢民耕種

生計艱難各懷怨恨首逆唐老大卽唐貴糾同逆目陳添培等以

驅逐漢民爲辭煽惑夷眾於本年正月起事焚搶村寨劫殺漢夷
裹脅至七八千人渡江擾及大姚分股恃險抗拒慶保自黔省審
案回滇途次接據稟報卽馳往調兵督辦先將大姚一股夷匪剿
洗淨盡擒獲賊目陳添培等其永北賊匪亦檄飭官兵攻破賊巢
生擒逆唐老大及賊目逆夷數百餘名掃蕩賊氛兩處地方悉
臻安謐慶保調度有方厥功迅速著加恩賞加太子少保銜並賞
給玉翎管一箇玉搬指一箇黃辦大荷包一對小荷包四箇以示
嘉獎呢瑪善導旨赴滇比到軍營雖已掃穴擒渠尙有零星匪竄匿
山谷該將軍不事貪功分派員弁入山搜捕深合機宜著加恩交
部議敘並賞給玉搬指一箇黃辦大荷包一對小荷包四箇史致
光由京回任卽馳赴軍營幫同辦理安撫事宜著加恩賞給玉搬
指一箇黃辦大荷包一對小荷包四箇其在事各員鎮道中有奮

勉出力者亟著秉公保奏候朕施恩其餘文武員弁擇其尤爲出力者應如何量加鼓勵之處分別開單具奏不可冒濫傷亡兵練咨部照例卹賞所獲各犯除業經正法外餘著照所議分別發遣其善後一切事宜仍著會同妥協辦理永靖邊圉○添設直隸大名鎮總兵官一左營遊擊守備千總把總外委各一額外外委三右營遊擊守備各一千總把總外委各二額外外委四移大名協都司爲城守營都司元城汛千總爲中軍千總添設把總外委額外外委各一移大名協副將爲開州協副將添設東明縣都司外委各一額外外委二長垣縣都司外委額外外委各一故城縣鄭家口遊擊一裁督標提標宣化廣平及天津水師各營遊擊以下共三十缺○以顧皋爲內閣學士兼禮部侍郎銜

曲肅

六月辛巳召康紹鏞來京以張師誠爲廣東巡撫調曹六興爲安

徽布政使以張志緒爲四川布政使陳中孚爲四川按察使

由福建

鴻道

○癸未添築山東韓莊閘上朱姬閘南攔河大壩○甲申安

定門災○以湖北當陽縣沮漳匯流處偪近 關帝陵詔建石隄

保護○乙酉諭軍機大臣會同刑部議奏奉天省旗民事件請仍

照舊章悉歸州縣審理一摺所議是國家設官分職各有專司奉

天省所屬州縣自乾隆四十四年經刑部議定凡遇旗民詞訟事

件悉歸州縣審理迄今四十餘年毫無窒礙原以州縣管理詞訟

是其專責若如該將軍所奏單旗事件卽令旗員辦理旗員於刑

名例案非所素習強使聽訟必難保其明允設武職人員任性妄

爲其弊尤不可言至謂旗民一切處分與州縣一體查參若無專

司旗人易於玩視京城五營與外省綠營武職均與司坊州縣官

一例開參豈能令武職各員俱赴文職衙門共理詞訟該將軍所

奏尤爲非理所有奉天州縣旗民事件著仍照定例悉歸州縣自行審理旗員不得干預惟該州縣於尋常人犯並不移知旗員率行查拏刑訊殊干例禁著奉天府尹飭知各州縣除緊要重案仍照舊例准其自行查拏外其餘尋常案犯均知會旗員拏解如仍前率拏交該將軍指名參處以符定制○諭本年順天府屬直隸天津山東近河近海地方蝻孽萌生飭令捕撲惟先應禁止擾累若按畝派夫胥吏復藉端索費踐踏禾苗則蝗孽未除而小民已先受害康濟錄內所載捕蝗十宜設廠收買以錢米易蝗立法最爲簡易著將康濟錄各發去一部交該府尹及該督撫飭屬迅辦務使閭閻不擾將蝗蝻接除淨盡以保禾稼而康田功○戊子調承光爲刑部右侍郎海齡爲盛京刑部侍郎○己丑海齡以親老命留京候補以同麟爲盛京刑部侍郎

由左副都御史遷

○庚寅

上御

太和門命鄭親王烏爾恭阿順承郡王倫柱恭齋冊寶詣 孝穆

皇后殯宮前行冊諡禮○調孫爾準爲廣東布政使以琦善爲福

建布政使由山東按察使遷○壬辰以冊諡 孝穆皇后禮成頒詔天下

○調琦善爲山東布政使以徐忻爲福建布政使羅含章爲山東

按察使由兗沂曹濟道遷○癸巳諭軍機大臣等御史王家相奏收漕加

米事類加賦八折收漕之議有十不可如經費尙須調劑或酌量

加銀尙屬易於限制等語漕糧爲國家正供果能顆粒無浮照額

兌運直達天庾誠爲盡善無如近年百弊叢生日甚一日幾於積

重難返前降旨令有漕各督撫悉心籌議嗣據孫玉庭等以幫費

不能盡裁陋規不能盡革浮糜不能盡去議以八折收漕減半給

費先去其太甚期於積弊以漸而除官民胥免於累業經降旨允

行茲據該御史復力陳其不可著將原摺發交孫玉庭等閱看孫

王庭係原奏之人魏元煜李鴻賓帥承濤則前此並未與議江浙漕務情形大略相同其各悉心體察上爲國計下爲民生如果八折之議實有窒礙難行之處不妨奏明更正不可回護前議然必須熟籌善策既不困民又不累丁使州縣無可藉口而漕運依限抵通方爲萬全無弊可以行之久遠若但博不淨收之名而貽誤全漕或仍如從前掩耳盜鈴任聽加五加六莫爲之限而外以收清漕不加賦爲名是皆可作紙上空談而非爲政以實之道該督撫等虛衷商榷深思妥議具奏儻彼此意見不同伊等孰有善策卽自行具摺陳奏以憑採察○乙未定 皇孫 皇曾孫 皇元孫暨各福晉服色等差○丙申諭軍機大臣等昨據御史王家相奏八折收漕之議有十不可當經降旨交孫王庭等會商妥議具奏本日復據侍郎湯金釗奏稱收漕之弊非定以八折所能有濟

且稱伊曾任江蘇學政知從前所言旗丁幫費於定額之外州縣仍不免私自增給恐八折收漕雖有限制之名仍無限制之實使朝廷空被加徵之名於事毫無實濟等語著將湯金釗原奏發交孫玉庭等閱看直省漕糧以浙江爲最重孫玉庭等四人係本省督撫所屬州縣收漕兌漕情形其利弊皆所洞悉究竟此事如何辦理方能有益無弊該侍郎及御史王家相所言不可之處均一一詳悉登覆熟籌審計會同妥議具奏○丁酉諭軍機大臣等前據姚文田奏漕務法久弊生小民苦州縣之浮收州縣苦旗丁之勒索而旗丁又因沿途需費浩繁勢必多索津貼恐所定津貼旗丁每船銀三百兩及見在嚴禁州縣收漕不得過八折之數亦屬虛名請籌議萬全善術等語當降旨令軍機大臣會同戶部議奏今據積奏運丁之疲乏屢經籌給津貼無庸再議惟州縣浮收積

習難返致累閭閻必任法而兼任人方能遵行無弊著各該督撫及漕運總督倉場侍郎通飭所屬杜絕浮收勒折以清其源裁革陋規以遏其流若有不肖州縣陽奉陰違立即參辦或運丁勒索州縣沿途衙門勒索旗丁一併從嚴究治務使官民旗丁均免擾累以肅漕政○戊戌以齊布森爲左副都御史由光祿寺卿遷○召成齡來京以李鴻賓爲漕運總督孫爾準爲安徽巡撫由廣東布政使遷○己

亥諭各省督撫鹽政織造關差向遇年節萬壽均有呈進方物之例惟是行之有年不免踵事增華有加無已雖皇考屢申飭諭尙未能盡除浮糜茲朕在諒陰之中若不先行示諭定以限制一俟釋服後自必相率效尤紛紛呈獻是以朕將從前貢目詳加披閱例應貢者准其呈進可刪者卽行刪去嗣後應進方物之處俱著遵照硃筆圈出之物件數目照例呈進毋得任意加增設遇某

件不敷採辦儘可缺而不貢斷不准將別項數目加增或以他物

代進其吉祥貢一端著永行停止發去硃圈貢目仍各遇便繳回

以備查覈至廣州將軍並無兼理關稅事務其每年例貢著無庸

進呈○以程國仁爲廣東布政使

降補郎中前任侍郎

○庚子移雲南永北

廳經歷駐舊衙坪增設司獄一大姚直卻巡檢一撥楚雄協把總

一駐猛連渡口○辛丑諭前據樂部等衙門奏時享 太廟初奏

樂章僅四言八句茲恭值 仁宗睿皇帝升祔奏迎 神之樂字

簡音長於行禮節儀未協請敬增四句當交大學士軍機大臣六

部會議茲據奏 太廟時享樂章國初定制初奏開平之章四言

十二句乾隆六年 高宗純皇帝親定樂章改開平爲貽平定以

八句 彝憲所垂至今遵守未便輕議更張等語所議甚是祀典

升香對越禮惟其節樂惟其和 太廟時享樂章經 皇祖高宗

純皇帝親加改定斟酌盡善數十年來依永和聲 神人胥悅自
富遵循勿替所有請增初奏樂章之處著無庸議○吏部奏查會
典服制圖載子爲慈母斬衰三年註云所生母故父令別妾撫養
者謂之慈母舊例未經載入見富纂修則例似應增入以廣孝思
請嗣後凡官員本身係屬庶出生母早故父令別妾撫養者病故
時准令離任丁憂二十七箇月從之○癸卯諭漕糧本惟正之供
歲有定額百姓任田納賦斷無不踊躍輸將者如果地方官辦理
得宜何容更定科則豫防濫取惟法以久而滋弊而弊又相因而
生則欲杜其弊必先察致弊之由而嚴爲之計著通諭有漕省分
各督撫破除情面力矢公忠州縣如有浮收勒折立即嚴參重懲
其旗丁勒索州縣紳衿包納漕糧者亦各執法嚴辦勿稍徇縱均
不得借言調劑輕改舊章至沿途僭運謹遵成法毋許延誤仍責

成漕運總督及倉場侍郎凡沿途抵通官役人等需索使費者有犯必懲使羣知儆惕以塞漏卮朕清釐漕務其意本爲恤民天庾並無升斗之益諒天下臣民所共悉不可使上被加賦之名而下無便民之實也將此通諭中外知之○甲辰諭成書等奏審明蔣因培被參後刊詞傳播前後情節分別定擬一摺此案蔣因培因山東兗沂各屬調補州縣疑有私弊欲行稟阻經該撫錢臻以越職狂謬挾私阻撓參奏革職輒敢刊刻稟呈詩句肆行傳播而所刻稟彙又與原稟語句多不相符尤爲狡詐蔣因培著發往軍臺效力贖罪童槐向錢臻面稟情形訊非誣捏惟蔣因培面阻一事其稟彙係由知府吳階送閱乃於明白回奏摺內不將吳階奏出轉言蔣因培在官廳喧呶係聞自韓公麟顯有諱飾所請開復原官交部議處未免從輕著開復交部嚴加議處吳階於蔣因培私

遞稟稟既不斥阻又不揭參僅送臬司閱看收存原稟迨至查辦之時始行呈出殊屬乖謬著交部議處錢臻見已另旨降補無庸交部察議已革知縣韓公麟既訊無向童槐告稱蔣因培喧嚷之語著准其開復原官○以琦善爲山東巡撫調程祖洛爲山東布政使降錢臻爲湖南布政使